



Broj: 01-02-2-1381/16

Sarajevo: 24. 5. 2016.

Imajući u vidu da su pravo na izražavanje, a samim tim sloboda mišljenja, sloboda primanja i širenja informacija i ideja bez miješanja javne vlasti i bez obzira na granice, osnovna ljudska prava zagarantirana Općom deklaracijom o ljudskim pravima i Evropskom konvencijom o zaštiti ljudskih prava i osnovnih sloboda;

Izražavajući zabrinutost zbog, sve više izraženog, govora mržnje koji podrazumijeva sve oblike izražavanja, uključujući govor, fotografije i videosnimke kojim se širi, podstiče, promovira, otvoreno poziva ili opravdava mržnja među rasama, ksenofobija, anitisemitizam ili drugi oblici mržnje zasnovani na netoleranciji, uključujući netoleranciju izraženu u agresivnom nacionalizmu i etnocentričnosti, diskriminaciji i neprijateljstvu prema manjinama, imigrantima i ljudima imigrantskog porijekla;

Svjesni štete koju govor mržnje proizvodi ako je prenesen putem medija i uticaja na sve kategorije društva, a posebno mlade;

Naglašavajući važnost i posebnu potrebu borbe protiv sve pristunijeg govora mržnje kojim se širi, podstiče, promovira i opravdava terorizam;

Osuđujući ponašanja koja vode radikalizmu i ekstremizmu svake vrste;

Pozivajući, podržavajući i zalažući se za dosljedno provođenje domaćih, ali i međunarodnih dokumenata kojima se nastoji zabraniti i sankcionirati govor mržnje, kao što su Međunarodna konvencija o ukidanju svih oblika rasne diskriminacije, Međunarodni pakt o građanskim i političkim pravima, Preporuka Vijeća Evrope o govoru mržnje, Konvencija o kibernetičkom kriminalu te Dodatni protokol uz Konvenciju o kibernetičkom kriminalu; a

Na osnovu člana IV. 4. (e) Ustava Bosne i Hercegovine i člana 165. stav (2) tačka a) Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15 i 97/15), Predstavnički dom Parlamentarne skupštine Bosne i Hercegovine je na 30. sjednici, održanoj 24.5.2016. godine, usvojio

DEKLARACIJU O OSUDI GOVORA MRŽNJE

Deklaracijom o osudi govora mržnje

1. osuđujemo govor mržnje i izražavamo svoju spremnost na dodatni angažman u borbi protiv nje, te pozivamo na angažman svih institucija s ciljem njegovog sprečavanja i sankcioniranja;

2. pozivamo članove zakonodavnih organa na svim nivoima da slijede naš primjer u osudi govora mržnje, kao i nosioce svih javnih funkcija da se, svjesni svog uticaja, ustručavaju od i bore protiv govora mržnje;
3. pozivamo Vijeće ministara Bosne i Hercegovine na dosljedno provođenje međunarodnih dokumenata, a posebno Dodatnog protokola uz Konvenciju o kibernetičkom kriminalu, ratificiranog 2006. godine, s ciljem sprečavanja i sankcioniranja govora mržnje;
4. ukazujemo na potrebu dosljedne primjene krivičnog zakonodavstva i eventualnog pooštavanja odredbi u krivičnim zakonima o krivičnim djelima počinjenim iz mržnje;
5. pozivamo medije da se sveobuhvatno, interdisciplinarno i interaktivno bore protiv govora mržnje te da, svjesni svoje javne uloge i uticaja na javnost, maksimalno kontroliraju svoj sadržaj i onemoguće slučajeve zloupotrebe svog medijskog prostora za plasiranje govora mržnje, kao i da daju svoj doprinos u upoznavanju javnosti o tome šta je govor mržnje i kako se sankcionira;
6. posebno ukazujemo na rastući problem zloupotrebe interneta u svrhu širenja govora mržnje;
7. ukazujemo na potrebu podizanja svijesti javnosti, civilnog društva i svih organa vlasti o krivičnim djelima počinjenim iz mržnje i primjerenim odgovorima na njih;
8. prihvatamo organizacije civilnog društva kao partnera u borbi protiv govora mržnje i ohrabujemo ih u aktivnostima koje preduzimaju radi borbe protiv govora mržnje;
9. pozivamo institucije Bosne i Hercegovine na provedbu zakona i organe pravosuđa na maksimalan angažman, u skladu sa zakonskim nadležnostima, u sprečavanju i sankcioniranju govora mržnje;
10. posebnu zabrinutost izražavamo zbog sve prisutnijeg govora mržnje kojim se širi, podstiče, promovira i opravdava terorizam - najveća sigurnosna prijetnja današnjice, te zahtijevamo puni angažman nadležnih institucija i društva u cjelini, s ciljem sprečavanja i sankcioniranja takvih aktivnosti u Bosni i Hercegovini.

Predsjedavajući
Predstavničkog doma
Parlamentarne skupštine BiH
Mladen Bosić